

UN RÊVE VOLANT

Es jour là... j'avo bu des « Porters »
J' vo z'avoue qu' j'avo l' vint in poupe
J' m'al indormi l' mouson in l'alr
...Et c'est doncque là ...qu' j'ai vu m' « Soucoupe »

Vo vo dites « Les Bribeux, ça volt doupe
On n' peut nin les printe au sérieux
ed' soucoupes... on in r'mue à l'escoupe
...Et c'est si couleteux... un Bribeux !

Dins m' rêve... (j' dis la pure vérité)
J'esto assis avenue de Ferrière
In face de chez l'amî Fiévet...
El' correspondant du Qu'min d' fier.

J'al vu dins l' ciel... un bassin d' nuit
...Vo savez bin... un réservoir
Qu'ont les malates pou faire pipi...
Tout arginté avé l' fond noir.

Au centre ej'... guignot eune nacelle
Pa d'sou d'eune lampe éblouissante
Et puis eune espèce ed' capelle
Tout in haut d'el machine volante.

Y avo étou des p'tits tonniaux,
Es un tas d' bouteilles étiquetées
Rimplées d' Bourgogne et d' vins d' Bordeaux
Ed' quel... ramasser cent muflés.

Vo stez au courant qu' dins l' Midi
El soleil pompe tous les rasins
Et qu' quand ceux-ci sont raquerpis
...Les saints du ciel... y font leu vin.

A m' n'idée s'to St-Emillon
Accompagné pa St-Estèphe
Qui apportinrent leu provison
A deux caftiers nommés Joseph.

Y d'vinrent d'aller chez l' père Lecluyse
Et puis chez l' Joseph du Palais
...Y estinrent rouges comme des cerises
Avec des auréoles dorées.

...Dins m' songe... j'approcho mine de rin
...J'arrivo à sto des flacons
...Et puis j'avanço mes deux mains
Quand j'ai erçu un coup d' baston

« Espèce de goinfre... vieux gougnafler
C'est pas pour toi cette ambrosie
...Adresse toi donc à St-Galmier,
Y t' fournira de l'eau bénie.

...Là d'eaus y erfrument leu bazar
Puis y aspoillent su un bonton
El truc es' liéfe... in plein pétard
Et fou l' camp du costé d'Hautmont.

J'ai du pousser un gros soupir
Pasqué Suzanne m'a dit ainsi

« Tu n'as donc pas e' que tu désires
Ou t'as l' cerveau qui fait des piis ? »

Ej' soupire pasqué j'ai rêvé
Que les saints patrons de nos bons vins
Les ont fait passer pa d'sou m' nez
In m' disant que j'ène d'auro nin.

« Bah ! ça n' fait rin... m' répond Suzanne,
T'es tout cranqueux... y faut t' soigner
J' m'en vals t' faire chauffer d' la tisane
Et boire un verre de St-Galmier.

A Cambrai... in Bergique... à Péronne
Les siens qu'ont vu ces machins-là
S' sont oublés dins leu maronne

...Mais un Bribeux... c'est pu haut qu' ça !
A. HANNEQUART (El' Bribeux).